

元史新編

元史卷二

本紀一下

太祖下

太祖卽帝位之元年丙寅金主璟泰和六年宋寧宗開禧二年也時乃滿太陽汗甫敗死其兄布魯汗已獻女迎降復叛去太陽汗子屈出律汗秘史作古出魯亦誘已降之蔑里吉部叛據阿勒台山太祖旣卽位遂發兵復征乃滿餘黨時布魯汗獵於兀魯塔山禽之以歸又追屈出律蔑里吉二酋於耶爾的石河卽今之額爾齊斯河也在金山之西射殪蔑里吉酋惟屈出律奔西契丹帝遣速不台追之而回軍和林命長子朮赤征嶺北林木中部落闢地至北海盡有漠北之眾控弦數十萬與西回紇接壤初金有般帝族祖俺巴海汗之仇會金叛宗愛王大辯自遼東遣使來具言金主璟般戮宗

親荒淫日甚帝聞之始議伐金以西夏與金脣齒乃先用

兵於西夏舊史謂金降俘來具言金主璟肆行暴虐乃議致討然尚未敢輕動云云案此所攻者漠北部落

安得有金降俘或即大金國志所述金愛王自遼東請援之事故然大金國志全本於南遷錄而此錄矛盾荒謬決

不可信攷金史鄭王允蹈被誅後不書一事惟鎬王允中傳云允中於明昌五年被誅其子石古乃之號謀反被誅其

三年有衛輝盜假稱愛王石古乃之號謀反被誅其實石古乃初未受王封也與定二年亳州民又造妖言愛王匿

民間終當奮發云云是愛王必謂鄭王允蹈之子故愛王復仇之說民間明明有之章宗紀明昌四年十二月鄭王

允蹈以謀反伏誅以財產分賜諸王公主五年二月宰臣請罷北邊軍馬不允九月敕尚書省集百官議備邊事命

上京等九路并諸乂等處選軍三萬俟來春調發並命諸部及北阻鞮以六年夏會兵臨潢六年五月鎬王允中以

罪賜死六月左丞相清臣遣使來獻捷八月行省都事獨吉永中來報捷十一月報敗敵於望雲十二月右丞相襄

率駙馬都尉僕散揆等進軍大鹽澤分兵攻取諸營詔招撫北邊軍民明年改承安元年大鹽澤羣牧使移刺觀等

為廣吉刺部兵所敗死之十一月特滿羣牧契丹陀鎖德壽等反泰州軍擊敗之十二月遣使勞賜北邊將士授官

者萬一千人受賞者幾二萬人凡用銀二十萬兩絹五萬匹錢三十二萬貫又承安二年八月以邊事未甯詔集六

品以上官問攻守之計竝舉方略材武者倣格選用又遣  
官分詣上京東京北京咸平臨潢西京等路招募漢軍  
足則簽補之此皆章宗時東北用兵之明證但謂敵寇之  
名不知所謂討何人正所謂欲益猶章者諺鄭王之死必有  
人冤故泰和七年詔追復允中允蹈王爵又爲之改葬立  
後所以昭雪其枉而求解於愛王也南遷錄年號世次官  
名人名錯謬固多不可盡信而其東北用兵一事則同見  
金史本紀斷非無因其降俘諸蒙古求援亦見元史太  
祖本紀皆非無因

二年丁卯金主璟泰和七年宋寧宗開禧三年也秋帝征  
西夏克幹羅海城是歲遣使於嶺北乞利吉思部旣而野  
帖亦納里部阿里替耶爾部皆遣使來獻名鷹皇子朮赤  
將右軍征幹亦刺部用降人爲鄉道遂征幹亦刺圖巴思  
諸部皆下之

三年戊辰金主璟泰和八年宋寧宗嘉定元年也春帝至  
自西夏夏避暑龍庭是年冬十月金主璟卒諡爲章宗其

叔父衛王允濟立

舊史以蔑里吉汗及屈出律汗之敗敘於是年誤以元年事爲二年事也據秘

史正之

四年己巳金主允濟大安元年宋寧宗嘉定二年也畏吾國亦都護遣使來貢帝入河西夏主李安全遣世子率師來戰敗之獲副元帥高令公克兀刺海城俘太傅西壁氏進至克夷門復敗夏師獲夏將鬼名令公薄中興府引河水灌之隄決水外潰遂解圍遣太傅訛荅入城招諭夏主夏主納女請和

五年庚午金主允濟大安二年宋寧宗嘉定三年也春金謀來伐築烏沙堡帝命前鋒哲伯襲殺其眾遂略地而東初帝未卽位受金職爲招討使貢歲幣於金金主使衛王允濟受貢於靜州帝見允濟不爲禮允濟歸請兵攻之旣

而不果會允濟嗣位有詔至國傳言當拜受帝問金使曰  
新天子爲誰金使曰衛王也帝遽南面唾曰我謂中原皇  
帝是天上人作此等庸懦人亦爲之邪卽乘馬北去自是  
遂與金絕益嚴兵爲備數侵掠其西北部

六年辛未金主允濟大安三年宋寧宗嘉定四年也春帝  
居怯綠連河西域哈刺魯部來降畏吾國亦都護來覲二  
月帝自將南伐侵雲中九原敗金將定薛於野狐嶺取大  
水濼豐利等縣初金將哈納邁住守北邊知蒙古將內侵  
密請設備金主責以擅生邊釁至是聞帝大舉南下大懼  
集廷臣議軍事不決遣使求和帝不許七月命左帥哲伯  
略地以金降臣耶律阿海爲先鋒乘勝破白登城遂攻西  
京今大敗金畱守紇石烈執中等一名胡沙虎追至翠屏山遂

取西京及桓撫州八月帝敗金師於宣平之會河川九月拔德興府居庸關守將遁去哲伯遂入關中都戒嚴大軍游奕城下金主議以細軍五千自衛奔南京會細軍五百誓死迎戰蒙古兵多傷問所俘鄉民此軍有幾鄉民給曰二十萬遂襲金羣牧監驅其馬而還遣皇子朮赤察合台窩闊台分徇雲內東勝武朔豐淨等州下之是冬駐蹕金之北境

七年壬申金主允濟崇慶元年宋寧宗嘉定五年也春正月帝破昌桓撫等州援兵三十萬於野狐嶺秋遂圍西京復誘敗金元帥奧屯襄援兵於密谷口盡殪其眾帝亦中流矢遂解圍所克德興等城堡金人復取之帝將休兵漠北會金降臣劉伯林等皆言金有天下十七路今甫得雲

中東西兩路然山前民不習戰已望風解體宜乘此取金

東京覆其根本中原可傳檄定帝乃引兵而南冬十二月

左帥哲伯攻東京不下佯解圍去遣人往諭而潛師隨其

後竟襲取之按耶律留哥傳太祖十年乙亥留哥破東京又石抹耶先傳木華黎傳皆謂用耶先計襲

破東京而秘史又謂哲伯襲破者東昌非東京種種不合但此時元兵未至東昌而東京十餘年後尙爲萬奴所據

傳聞異詞姑並存之先是金上京留守徒單鑑上言國家與蒙古交

兵以來彼聚而攻我散而守以聚攻散勢所不敵不若入

保大城并力備禦昌桓撫三州素號富强可內徙其民以

益兵又奏遼東國家根本距中都千里緩急請報不濟可

遣大臣行省以鎮之金主謂徙民是自蹙境土且無故設

行省動搖人心不從至是西京東京相繼陷沒耶律留哥

復以上京叛而來降中外震動金主乃大悔



八年癸卯金主珣貞祐元年宋寧宗嘉定六年也春遼裔耶律留哥起兵十餘萬於隆安自稱都元帥號遼王改元

元統敗金元帥完顏承裕之兵

舊史言承裕之兵六十萬號百萬案是時金兵禦蒙

古不暇何得有六十萬攻遼東之事止書於留哥傳而不見本紀明爲留哥降元時虛張己功之詞不可信承裕一名胡遣使來附秋七月蒙古軍克宣德德興二府進至懷

來及金行省完顏綱元帥高琪戰敗之追至居庸北口金

兵固守治鐵錮關門布鐵蒺藜百餘里守以精銳蒙古兵

不能前乃趨紫荆關入敗金師於五回嶺拔涿易二州分

命哲伯同速不台由居庸關左閒道反攻南口出居庸關

之背遂奪其險

按舊史本紀言攻居庸關不入乃改趨紫荆口入而札巴爾傳又言從居庸關左黑

松林中閒道入一事二計疑林中閒道僅容一騎不足容大軍故太祖自引大軍趨紫荆而別遣哲伯從速不台以偏師數百由閒道入蓋八月金胡沙虎兵敗懼誅遂弑其

奇正相兼而用之也

主允濟立豐王珣改元貞祐是秋帝復以一軍屯燕都城  
北綴金禁衛軍而別分兵三道命皇子朮赤等爲右軍循  
太行而南取保州中山邢洺磁相衛輝懷孟諸郡直抵黃  
河掠澤潞遼沁平陽太原閒皇弟合薩爾及幹陳那顏等  
爲左軍遵海而東取薊灤及遼西諸郡帝與皇子拖雷爲  
中軍取雄莫河閒清滄景獻泰安濟南濱棣等郡每路皆  
以金降人爲鄉道時金諸路兵皆調赴山後防遏內地虛  
空乃僉鄉民守城我軍盡驅其家屬來攻父子兄弟遙相  
呼應人無固志又下令降者免拒者屠故所向無不克凡  
破九十餘城兩河山東數千里城郭廬舍丘墟金帛子女  
牲畜盡歸沙漠惟燕京通順眞定青沃太名東平德邳海  
州十一城未下是冬帝至燕三道兵還合屯大口以徧中

都是年冬十月金大將高琪以乂軍討胡沙虎殺之初胡沙虎弑逆國人懷怨言者多請正其罪金主貪其援立功不忍殺至是爲乂軍所戮乃詔暴其罪宣示中外

九年甲戌金主珣貞祐二年宋寧宗嘉定七年也初金忠獻王粘罕營燕城因遼人宮城於內城外築四城每城各三里前後各一門樓櫓池塹倉廩甲仗庫各穿地道與內城通時人皆笑其過計粘罕曰百年間當以吾言爲信至是命京師富戶遷入東子城百官家屬入南子城宗室保西城戚里保北城各分守兵四千內城二萬盡運瓦石薪米入城旣而積雪冰沍北兵乏食正月北兵攻南順門破金人設拒馬於南街縱其入已半里自縱火燒四旁屋街狹屋倒崩北兵死傷甚眾北兵又攻內城四城兵皆迭自

城上擊之北兵失勢圍城自冬逾春不破

舊史但言城不破而所以破與

不破之由則惟南遷錄得之節取補入

三月以天暑將班師時軍在中都之

北諸將請乘勝破燕太祖不從乃遣使諭金主曰山東河

北郡縣悉爲我有汝惟守燕京耳天旣弱汝我復迫汝以

險天其謂我何今大軍將還汝能犒師以弭諸將之怒否

金主遣使求和奉衛紹王女岐國公主及金帛童男女車

馬以獻帝遣使如金迎女師還金遣丞相完顏福興送帝

出居庸金主以河北山東畿輔盡失蒙古兵朝發夕至且

兵燹後市巷蕭條城外旱饑草莽彌望盜賊蠭起燕京不

能守夏五月遂遷都於汴畱平章完顏承暉及參政抹撚

盡忠輔太子守忠固守中都帝聞之怒曰旣和而復遷都

是有疑心特以解和款我耳復圖南侵適金所招北邊乂

部二十五族爲軍二千人以禦蒙古者至是扈衛南遷高  
琪下令鎧馬悉令還官軍憤怒作亂六月殺金將自推主  
帥來納款時帝避暑魚兒渚方怒金南遷遂遣石抹明安  
援之入古北口與乂軍合偪中都秋七月金主用高琪言  
并召太子守忠赴汴冬十月帝命木華黎征遼西蘇天爵名臣事略作遼西高州盧琮金樸等以城降錦州張鯨殺其節  
度使自立爲臨海王遣使來附始置行省於宣平以統金  
降民

十年乙亥金主珣貞祐三年宋寧宗嘉定八年也春正月  
金右副元帥蒲察七斤以通州降二月木華黎攻金北京  
金元帥寅答虎以城降舊史作寅答虎烏古倫攷東平王世家則烏古倫乃其氏非名史不辨姓名顛倒以烏耶爾權兵馬都元帥鎮之遂進偪興中  
之遂若兩人

府元帥石天應相繼來降金主遣使招耶律畱哥降不應

乃命宣撫司完顏萬奴屯兵濟州經略遼東舊史畱哥傳言金遣萬奴

領軍四十餘萬攻之又遣左副元帥伊刺都以兵十萬攻之皆爲畱哥擊敗案是時金已遷汴燕都旦夕不保何得

有數十萬兵攻遼東舊史不書於本紀明亦畱哥降元時自侈攻伐之詞不可信又本紀皆作蒲鮮萬奴惟本華黎

傳作完顏萬奴又兀良合台傳作女真國可證爲金宗室今從之三月金主遣御史中丞

李英等來援中都敗之霸州守將史天倪降夏四月詔錦

州張鯨總北京十提控兵從南征鯨謀叛伏誅鯨弟致遂

據錦州自稱瀛王改元興龍下平灤瑞利義懿廣寧等州

本華黎遣先鋒權帥烏耶爾等軍討之時金丞相高琪忌

承暉成功中外援兵無一至中都者五月庚申金中都畱

守完顏承暉仰藥死抹撚盡忠棄城走先後圍中都三年

乃克之時帝方避暑桓州遣使籍中都帑藏輦運北去得

遼宗室耶律楚材畱侍左右金遣使求和帝報使命以河  
北山東未下諸城來獻去帝號爲河南王金不從授史天  
倪右副都元帥賜金虎符南征八月天倪取平州木華黎  
遣史進道等攻廣寧府降之是秋取城邑凡八百六十有  
二冬十月金遼東宣撫司完顏萬奴爲耶律畱哥所敗走  
保東京畱哥攻陷之萬奴率眾十餘萬走海島會畱哥所  
部內亂萬奴復據遼東僭稱天王國號女真舊史本紀作  
大真案兀良  
合台傳作女  
真國今從傳改元天泰十一月耶律畱哥來朝以子薛闍  
入侍

十一年丙子金主珣貞祐四年宋寧宗嘉定九年也春還  
盧朐河駐軍魚兒灤夏取金曹州及霍山諸隘秋遣三模  
合拔都將萬騎由西夏趨關中攻潼關不下乃由嵩山小

路趨汝州遇山澗輒以鐵槍連鎖爲梁直抵汴京金主急召花帽軍於山東來拒蒙古軍不利時金知平陽府胥鼎聞蒙古兵渡河卽遣必蘭阿魯帶徒單百家帥兵萬五千由便道濟河趨關陝而自以精兵援汴京又使僕散掃吾出帥諸將兵以拒蒙古兵之自關而東者金主拜胥鼎尙書左丞行省事於平陽鼎慮蒙古兵扼河乃檄絳解隰吉孟州五經略司會師夾攻及蒙古自三門集津北渡至平陽鼎遣兵拒戰蒙古敗去金人乃乘冰渡河還陝州遂復潼關時金平章高琪以蒙古兵日偪欲以重兵駐汴自固郡縣殘破不復恤又力勸金主南伐宋以廣疆土河北兵力益分冬十月完顏萬奴降以其子帖哥入侍旣而復叛僭稱東夏木華黎克錦州殺張致遼西平



十二年丁丑金主珣興定元年宋寧宗嘉定十年也始置行省於燕雲以圖中原是歲帝將自征西夏以中原事任木華黎秋八月以木華黎爲太師封國王將蒙古乂漢諸軍南征詔曰大行以北朕自制之大行以南悉以責卿賜大駕所建九旂旗命諸將咸受節制如朕親臨於是木華黎專征河北拔遂城蠡州冬克大名府遂東定益都淄登萊濰密等州

十三年戊寅金主珣興定二年宋寧宗嘉定十一年也秋八月兵出紫荆口獲金將張柔授河北都元帥木華黎自西京入河東克太原平陽及忻代澤潞汾霍等州金將武仙攻滿城張柔擊敗之是年帝伐西夏圍其王城夏主李遵頊令其子居守而自奔西涼契丹六哥據高麗江東城

命哈真札刺率師平之高麗王瞰遂降請貢方物

十四年己卯金主珣興定三年宋寧宗嘉定十二年也春張柔敗武仙拔祁州曲陽中山等城深冀以北鎮定以東悉望風來附夏六月乃蠻太陽汗子屈出律據西契丹國殺使者帝怒而西征時方攻西夏西夏僞請和且請出師以從帝乃舍西夏而征回紇回紇者本乃蠻部舊名及屈出律竄據西契丹仍以回紇稱之西契丹世號西遼卽前遼宗室耶律大石國也遼亡率所部據有西域葱嶺東西地傳國八十餘年至是屈出律投之爲所寵任得兵權乃誘契丹主出獵伏兵八千禽之尊爲太上皇而篡其國竝脅葱嶺以東天山南北諸部皆爲役屬帝恐其梟雄鳴張將復搖漠北和林舊都乃親率大軍由天山北路取訛荅

刺城禽其酋遂進逾葱嶺以擣之諸皇子分攻天山以南于闐諸城亦爲一路竝會于西契丹之西都河中府卽葱嶺西尋思千城也是年秋木華黎克尙嵐吉陽等州進屠絳州金平章高琪用事凡精兵皆聚河南而置河北於不問西啟夏斡南侵宋疆爲擴邊之計又棄汴京外城不守更築裏城四十里盡取民家輒發蔡京宅得輒二百餘萬勞費無算復請修山寨於少室山以辟兵號大小二御寨有識者至比爲景陽之井琪於異己者輒出之河北州郡險地人心解體琪尙自負修裏城功謂敵卽至可無虞金主責之曰僅守一城何以爲國何如拒寇不至城下之爲愈琪語塞是冬以罪伏誅然其黨高汝礪白撒猶用事明年三月汝礪進尙書省右丞相陝西行省晉鼎罷

十五年庚辰金主珣興定四年宋寧宗嘉定十三年也春三月帝克蒲華城夏五月克尋思千城駐蹕耶石的石河秋攻克斡脫羅兒城木華黎徇地至真定武仙降以史天倪爲河北兵馬都元帥仙副之濟南嚴實趙彰德大名磁洺恩博濬滑等州戶三十萬來歸冬木華黎攻東平不克畱嚴實守之分兵徇河北諸郡金邢州節度使武貴降泰定軍節度使完顏畏可死之授董俊右副都元帥駐橐城十六年辛巳金主珣興定五年宋寧宗嘉定十四年也時乃蠻酋屈出律亡爲大將哲伯所斬西遼諸城復叛歸回回算端春帝攻卜哈爾等部復克尋斯千城皇子朮赤攻養吉千巴爾真等城竝下之夏四月駐蹕鐵門關金主遣烏古孫仲端奉國書遠逾葱嶺至行在請和稱帝爲兄不

允宋漣水忠義統轄石珪以眾降金東平行省事芒古棄城遁嚴實入守之自金南遷以大河爲固大河以東平爲藩籬又前此所破城邑卽委去之未嘗置兵戍守故旋爲金據連年攻戰不息至是東平復拔木華黎懲前失命嚴實石珪中分其城安撫南北州郡於是金不能復守山東六月宋遣苟夢玉來通好約兵攻金使報之秋帝攻蔥嶺西班牙勒紇等城皇子朮赤察合台窩闊台分攻蔥嶺東于闐玉龍傑赤等城下之冬十月皇子拖雷克哈薩克布魯特喀什噶爾葉爾羌烏什等城木華黎由東勝渡河而西克葭綏德保安鄜坊丹等州進攻延安破金兵金將完顏合達固守不下遂移師取隰州十一月宋京東安撫使張琳以京東諸郡來降命琳行山東東路都元帥府事是

歲耶律楚材進庚午元祿

十七年壬午金主珣元光元年宋寧宗嘉定十五年也春皇子拖雷克徒思匿察兀爾等城還經木剌夷國大掠渡朔朔闌河克耶里等城來與帝會合兵攻拔塔里寒寨木華黎軍克乾涇邠原等州攻鳳翔連營數百里金將完顏合達復以兵二十萬固守不下夏帝避暑塔里寒寨西域回回國主札闌丁出奔與蔑里可汗合帝自將擊之禽蔑里可汗札闌丁遁去秋金復遣烏古孫仲端來請和見帝於回鶻國帝謂曰我向欲汝主授我河朔地令汝主爲河南王彼此罷兵汝主不從今木華黎已盡取之乃始來請邪仲端乞哀帝曰念汝遠來河朔旣爲我有關西數城未下者其割付我令汝主不失爲河南王可也仲端乃歸木

華黎徇青龍堡金平陽公胡天祚降取牛心寨知吉州楊  
貞盡室死之冬十月金河中府來附木華黎以石天應爲  
兵馬都提控守之諸將諫曰河中雖用武之地南有潼關  
西有京兆皆金精兵所屯且其民新附其心未一守恐不  
易天應以河中形勢四接可起漕運以餽關內之軍關內  
定則長河以南在掌握決計守之乃作浮橋以通陝西金  
將侯小叔自中條率兵來襲天應戰死遂毀浮橋復取河  
中旣而我兵十萬復圍河中破之明年二月浮橋成木華  
黎渡河還至聞喜病卒

十八年癸未金主珣元光二年宋寧宗嘉定十六年也夏  
帝避暑八魯灣川皇子朮赤等兵自回部踰葱嶺來會遂  
定西域置諸城達魯花赤治之華言掌印官也冬十二月

金主珣殂子守緒立改元正大是歲夏主李遵頊傳國於子德旺大將速不台哲伯兩軍擊欽察追至寬甸吉思海執其酋八里蠻而還宋復遣苟夢玉來聘

十九年甲申金主守緒正大元年宋寧宗嘉定十七年也夏宋總管彭義斌侵河北史天倪與戰於恩州敗之帝征西軍旣平西契丹將往征印度進至北印度之鐵門遇異獸一角能人言曰天道好生人主宜早還帝曰印度乃自古神聖所降之地今遇此其天乎遂班師是歲宋主擴殂廟號寧宗子貴誠立是爲理宗

二十年乙酉金主守緒正大二年宋理宗寶慶元年也春正月還行宮自出師至此凡七年二月武仙以真定叛殺史天倪三月史天澤擊仙走之復真定夏六月彭義斌以



兵應武仙天澤禽斬之冬十月武仙襲據真定天澤奔橐  
城董俊判官李全亦以中山叛

此非據益都之李全也

二十一年丙戌金主守緒正大三年宋理宗寶慶二年也  
帝既定西域遂回軍討西夏初夏主僞乞盟請納質子且  
言願助兵討回紇

見十四年

及師行徵其兵其大將敢布對使

者曰俟大國兵敗時我國再出兵且至是不遣質子又收  
納叛亡遂征之春二月取黑水城夏帝避暑於渾垂山取  
甘州肅州秋克西涼府朔羅河羅諸縣遂踰沙陀至黃河  
九渡取應里等縣史天澤夜赴真定合兵攻武仙仙走西  
山抱犢砦九月宋京東路總管李全執張琳郡王帶孫進  
兵圍全於益都冬十一月庚申帝攻靈州夏遣鬼名令公  
來援丙寅帝渡河擊夏師敗之丁丑五星聚見於西南帝

自西域遇角端已思止殺至是感五旱之祥又得耶律楚材及真人丘處機之勸乃下詔止殺除臨陳攻城外不許虜掠竝詔諸軍皆嚴節制秋毫無犯駐蹕鹽州川十二月李全以青州降授全山東河南行省以招降山東郡縣是歲皇子窩闊台及察罕之師圍金汴京遣唐慶責歲幣於金夏主德旺以憂卒子覲立金平章政事英國公胥鼎卒二十二年丁亥金主守緒正大四年宋理宗寶慶三年也春帝畱兵攻夏王城自率師渡河下積石州二月破臨洮府三月破洮河西寧二州遣國王幹陳那顏拔信都府夏四月帝次龍德拔德順等州五月遣唐慶等使金閏月避暑六盤山六月金遣完顏合周奧屯阿虎來請和帝謂羣臣曰朕自去冬五星聚時已嘗許不殺掠遽忘下詔邪今

可布告中外令彼行人亦知朕意金主聞蒙古有止殺之言遂以爲從此息兵命有司罷防城兵役及軍需租調不急者是月夏主李睨降西夏亡帝次清水縣西江秋七月壬午不豫已丑崩於六盤山之薩里川行宮臨崩謂左右曰金精兵在潼關南據連山北限大河難以遽破若假道於宋宋金世仇必能許我則下兵唐鄧直擣大梁金急必徵兵潼關然以數萬之眾千里赴援人馬疲弊雖至弗能戰破之必矣後卒如帝言壽六十有六諸皇子奉梓宮歸漠北葬起輦谷明年戊子皇子拖雷監國上尊號曰索多博克成吉思汗世祖至元三年冬十月追諡聖武皇帝武宗至大二年冬十一月庚辰加諡法天啟運聖武皇帝廟號太祖在位二十二年帝深沈有大略用兵如神故能滅

國四十遂平夏克金有中原三分之二使舍其攻西域之力以從事汴京則不俟太宗而大業定矣然兵行西海北海萬里之外昆侖月竊重譯不至之區皆馬足之所躡如出入戶闥焉天地解而雷雨作鷗鵬運而溟海立固鴻荒未闢之乾坤矣惜舊史荒昧祕史亦惟詳伐夏以前今參攷旁摭條舉大綱正其僣複其詳則別具於削平各國傳



元史卷三

本紀二

太宗

定宗

太宗英文皇帝諱窩闊台

一作韓哥台一作月古台

太祖第三子母曰

光獻皇后弘吉剌氏太祖伐金定西域帝攻城略地功居多初太祖議立儲嗣兄弟互推於帝語詳太祖諸子傳太祖末年命帝將兵征西域踰葱嶺以西霍博之地聞太祖之喪旋師來會踰年始至其未至以前皇弟拖雷攝國事者一載

元年己丑金主守緒正大六年宋理宗紹定二年也夏駕至忽魯班雪不只之地皇弟拖雷來見八月己未諸王百官大會於怯綠連河以太祖遺詔卽皇帝位始立朝儀皇族尊屬皆拜頒大札薩漢言大法令也先是太祖初崩金

遣使弔喪至是復遣使歸太祖之贈帝曰汝主久不降致先帝老於兵閒吾豈能忘也贈何爲哉卻之詔曰我成吉思皇帝艱難創立國家其未行德政宜及時建立其定算賦中原人以戶計西域人以丁計蒙古以馬牛羊計各出賦調編中原人爲軍二十丁出一卒年二十以上者充之蒙古人有馬牛羊者每百分輸一入官又輸一以膳其部眾凡中原賦調耶律楚材主之西域以回鶻人馬合墨的主之蒙古以色目親臣主之始置倉廩立驛傳凡諸王駙馬聚會及差使來往不得科斂百姓可令千戶歲出備差車馬到驛交替其沙磧無水草者相視可井處立營其在官金帛器械倉庫宜置官簿籍典守毋得擅取蓋博爾朮及耶律楚材之議也詔下頒行中外稱便以史天澤統貢

定河間大名東平濟南五路漢軍劉疑統平陽宣德等路漢軍俱爲萬戶是歲印度木羅夷二國來會西域伊思巴刺城部長來降冬十二月大將赤老溫帥師圍慶陽金遣使阿古台來聘再歸太祖之贈復卻之

二年庚寅金主守緒正大七年宋理宗紹定三年也春正月詔自今以前事勿問定諸路課稅酒課驗實息十取一雜稅三十取一是春帝與拖雷獵於幹爾寒河遂益兵圍慶陽金副樞伊刺蒲阿等率兵來援戰於大昌原其先鋒完顏彝以忠孝軍四百騎敗蒙古軍八千蒙古軍遂解圍走自南北構兵二十年金始有此捷奏功第一於是陳和尚之名震中國授定遠大將軍世襲謀克忠孝軍皆回紇乃滿羌渾及中原亡命受募者鶩很難制惟彝御之有方



坐作進退皆中程式所過州縣秋毫無犯每戰則先登疾  
若風雨諸將倚以爲重完顏彝即陳和尚也大昌原之戰  
年本金史忠義傳也或係於六年本金史哀宗紀也然元  
史此兩年拖雷監國太宗未即位金史本紀亦不書惟正  
大七年哀宗紀正月蒲阿等解慶陽之圍即此一事諸傳  
誤分慶陽大昌原爲二事又或以去冬圍城時爲今春解  
圍夏避暑於塔密爾河速不台及金將完顏彝戰於倒回  
谷復敗績士馬填塞谿谷幾滿完顏彝欲追擊之金諸將  
謂不如釋之以爲德遂不追時蒙古軍攻京兆鳳翔者皆  
潰退數日後知金無追兵復聚而圍鳳翔金元帥蒲阿既  
連解慶陽鳳翔之圍志氣驕溢遇使臣幹骨樂往蒲阿遣  
歸告以整兵待戰帝震怒遂決計南伐蒲阿之馭軍也無  
法好趨小利嘗一日夜馳三百里剽掠今日得生口三百  
明日得牛羊一二千士卒喘死者則不問完顏彝嘗因宴

會面斥其失蒲阿不能改彝曰國家兵力必壞於此人之  
手吾權位不敵惟以死報國而已秋七月帝自將征金詔  
曰朕蒙席成業無功勞於國家惟茲金國尙阻聲教未究  
皇考之緒朕宜親征以終前烈其令朕叔父幹赤斤大王  
畱守和林老營其皇考所征西域未下者有巴赫塔部及  
康里欽察十一部今宜濟師繼往諸王在內者以巴圖爲  
長在外者以古余克爲長凡進征之諸王駙馬萬戶千戶  
百戶均以長子出行庶人馬多氣勢盛敵人畏懼爾諸王  
駙馬將士其各勦哉皇弟拖雷皇弟子蒙哥率師從拔天  
成等堡遂渡河攻鳳翔八月金降將武仙復歸金金復以  
爲恆山公置府衛州蒙古兵圍之金完顏合達來援完顏  
彝先登蒙古軍皆北史天澤以千人繞出金兵後來攻之

仙敗走天澤遂取衛州冬十一月立燕京宣德西京太原平陽眞定東平北京平州濟南十路稅課所設使副二員詔諸路州縣長吏專理民事萬戶府專總軍政課稅使專掌錢穀各不統攝是月師攻潼關藍關不克十二月拔天勝寨及韓城蒲城

三年辛卯金主守緒正大八年宋理宗紹定四年也春正

月師圍鳳翔金主遣完顏合達及蒲阿救之逗畱不進二

月遂克鳳翔

舊史此下有攻洛陽河中諸城下之之語案此時尚未濟河安得下洛陽邪又十月方克

河中何得此時先下邪今不取

夏四月金將完顏彝復以忠孝軍敗速不

台於倒回谷帝召責速不台旋復使從皇弟拖雷南伐夏

五月避暑於九十九泉帝議分南北軍夾攻金約會於汴

先命拖雷出師南路拖雷遣朔不罕使宋假道淮東以擣

河南從太祖遺命也宋統制張宣誘殺之復遣李國昌使  
宋需糧秋八月幸雲中始立中書省改侍從官名以耶律  
楚材爲中書令粘合重山爲左丞相鎮海爲右丞相是月  
以高麗殺使者命薩禮塔率師討之取四十餘城高麗王  
瞰遣其弟懷安公請降薩禮塔承制設官分鎮其地乃還  
拖雷聞宋殺使臣怒曰彼昔遣苟夢玉來今何遽背約耶  
卽移師伐宋破興元入大散關直趨饒風關宋軍民散走  
死於沙窩者數十萬冬十月帝出師北路圍河中府拔之  
十二月拖雷兵三萬渡漢金諸將欲邀擊於半濟蒲阿不  
從拖雷遂引兵全濟畱輜重以輕騎先進戰於禹山明日  
潛兵光化林中金人偵之四日不聞音響合達蒲阿遂引  
兵就糧鄧州蒙古兵襲其後隊金兵幾不成列夜二鼓始

入鄧州城金帥隱其敗反以大捷聞汴京解嚴不設備  
四年壬辰金主守緒天興元年宋理宗紹定五年也春正  
月戊子帝自河中用西夏人恤克計由河清縣白坡濟河  
攻洛陽下之遣人馳報拖雷軍拖雷亦已渡漢江遣使來  
報卽詔諸軍進赴新鄭金元帥合達蒲阿等以步騎十五  
萬援汴拖雷以鐵騎三千更番擾之金兵且戰且行晝夜  
不得飲食休息距鈞州三十五里蒙古北路軍前鋒亦會  
乘大雪合擊夾攻於三峯山俟其困憊開鈞州路縱之走  
金軍潰聲如雷獲其大將蒲阿翼日帝大軍至會攻鈞州  
獲其元帥合達於城中其裨將完顏彝死之金盡徹潼關  
藍關守兵入援其守將李平以潼關降師遂長驅入盡下  
商虢嵩汝陝洛許鄭陳亳潁壽睢等州三月遣使諭金主

曰汝所恃惟黃河與完顏合達爲長城今我已渡河殺合達更何所恃邪金主遣其兄子曹王訛可入質帝及拖雷北還畱速不台守河南圍汴金臣議以汴京外城不可棄仍舍裏城守外城外城周世宗時取虎牢土所築礮不能入惟周圍百二十里備多力分糧少夏四月金降將國安用叛歸金金封爲堯王帝出居庸避暑官山時金有大礮名震天雷以鐵罐盛藥以火發之其聲聞數十里所熱圍半畝以上其所著鐵甲皆透蒙古兵冒牛皮至城下掘孔城上以鐵繩懸雷礮縋下火發人與牛皮皆破迸無迹又有飛火槍注藥以火發之輒前燒十餘步蒙古惟畏此二物攻城十六晝夜內外死者百萬計速不台乃爲好語曰兩國已講和更相攻邪金主就應之遣官出城以酒炙犒

軍且賂以金帛珍異速不台乃許退兵避暑汝州高麗叛  
殺所置官吏徙居江華島復遣薩禮塔征之秋七月帝不  
豫拖雷禱於山川請以身代遣唐慶使金諭降金殺之和  
議遂絕八月金主畱軍守汴自將出都如河北速不台敗  
金恆山公武仙援軍於汴城外使宣撫王檄至宋約共伐  
金宋遣鄒伸之報謝約成功後以河南歸宋九月帝瘳北  
還拖雷薨於中途帝還龍庭冬十一月獵於納蘭赤刺溫  
之野十二月詣太祖帳殿

五年癸巳金主守緒天興二年宋理宗紹定六年也春正  
月金主濟河攻衛州兵敗復走河南入歸德金西面元帥  
崔立殺畱守等官以汴京降二月幸鐵列都之地皇子貴  
由及國王塔思諸王按赤台等討平完顏萬奴於遼東萬

奴金宗室據遼東十九年至是始滅語詳收復東北諸部  
傳夏四月速不台軍進至青城

卽金受宋降之地也

崔立以金太后

王氏后徒單氏及梁王從恪荆王守純等五百餘人至軍  
中速不台殺金二王及其族屬送金后妃等於和林遂入  
汴京速不台奏請屠之耶律楚材入朝力爭乃詔除完顏  
氏一族外餘皆原免初大將撒吉思不華及帖木爾台帥  
兵取金睢州遂圍金主於歸德府或獻決河灌城之策河  
旣決從西北下至城南入故睢水城反以四面環水爲險  
固不能進攻索獻策者已不知所往乃退屯亳州至是金  
將富察官奴密陳斫營之策佯遣使詣軍前納款以求其  
母爲名誓劫金主以降乘船會議中流往返數次官奴探  
知王家寺帥帳所在夜率忠孝軍五百攜火攻具登舟殺



守堤邏卒分軍出柵外腹背夾攻火槍雷震蒙古軍大潰  
焚溺死者三千餘遂解圍拔營回亳時金主繫舟北門以  
待慮不勝則走徐州及天明大捷始回城官奴自破蒙古  
軍後恃功跋扈無上居金主照碧堂諸臣無一人敢奏對  
者金主決策欲遷蔡州官奴復言不可金主與左右謀伏  
兵斬之遂奔蔡州塔察爾率師圍蔡括中州戶得七十三  
萬餘冬十一月宋遣荆鄂都統孟珙以兵二萬糧三十萬  
石來會伐金冬十二月諸軍與宋兵合攻蔡取唐州敗武  
仙於息州金人以海沂萊濰等州降是冬徐州軍降國安  
用自殺敕建國子學於燕京頒宣聖玉帛修渾天儀  
六年甲午金主守緒天興三年宋理宗端平元年也春正  
月師及宋師攻蔡州州恃潭爲固外卽汝河潭高於河五

六丈至是決而注之實以薪葦遂濟師徑攻北門宋將孟琪攻南門頃刻萬眾蟻附而登城遂破金主先一日自盡於幽蘭室翼日城中諸將縱火自焚死金亡與宋約和以陳蔡東南地屬宋各引兵退立北平汴梁等處鎮守官而還金主嘗言蒙古所常取勝者恃北方之馬力資中原之技巧朕實無如何若如宋人朕得甲士三千橫行江海矣是春帝會諸王宴射於幹爾寒河夏五月駐蹕達蘭達巴之地復大會諸王百僚頒條令曰凡當會不赴而私宴者斬諸出入宮禁各有從者男子以十人爲朋出入毋得相雜軍中凡十人置甲長聽其指揮專擅者論罪其甲長以事來宮中卽置權攝一人甲外一人二人不得擅自往來違者罪之諸公事非當言而言者劓其耳再犯笞三犯杖

四犯論死諸千戶越萬戶前行者射以木鏃百戶甲長以下有犯其罪同凡來會諸軍甲內不足數於近翼抽補其來會者用善馬五十匹爲一羈守者五人飼羸馬三人守乞烈思三人乞烈思繫馬所也盜馬一二匹者論死諸人馬不應絆於乞烈思內者沒與畜虎豹人諸婦女製只孫燕服不如法者及妒者乘以騾牛徇部中論罪卽助貲更娶秋七月宋人背盟初來會破蔡州時約分蔡州以南爲宋蔡州以北爲蒙古各解兵反國時汴洛空虛宋將趙葵等議乘諸軍北歸襲取中原扼關守河爲恢復計宋丞相鄭清之惑其謀言於宋主遂遣趙葵全子才等率兵六萬攻汴行省李伯淵殺崔立降於宋宋將徐敏子西攻洛陽蒙古戍兵先期空城去宋兵糧盡引還諸軍追擊大敗之速不台

還師來赴決黃河寸金淀水灌宋軍多溺死趙葵金子才等乘汴遁於是上決計南征令以胡土虎爲中州斷事官遣達海紉布征蜀是秋遣國王塔思伐宋冬十二月再遣使王檝詣宋責敗盟宋復遣鄒伸之報謝自是江淮閒無寧日

七年乙未宋理宗端平二年也春城和林作萬安宮爲會

同之所建城周五里設宮闕立驛傳以便貢輸命皇子貴

由皇兒子拔都

按拔都卽赤赤太子之子也太宗時但有拔都而無赤赤殆皇兄先薨矣其封阿羅

斯殆亦拔都之始封與

皇弟子蒙哥征西域皇子闊端征秦鞏皇子

曲出及胡土虎伐宋命唐古征高麗秋七月命諸王叩溫

不花攻江淮張柔略漢口冬十月皇子曲出拔宋棗陽軍

遂徇襄鄧入郢虜人民牛馬數萬而還十一月皇子闊端

攻石門金都總帥汪世顯降遂入沔州時金既亡惟秦鞏二十餘州尚未下從耶律楚材言詔闊端招諭許以不殺諸州皆降惟會州都總管郭斌文州知州劉銳固守及城陷闔門死之命中書省臣契勘大明麻

八年丙申宋理宗端平三年也春正月萬安宮落成諸王各治具來會宴初行交鈔以萬錠爲額二月命應州郭勝鈞州李朮魯九住從曲出充先鋒伐宋以鄧唐均三州偏襄陽敵境且歲荒徙其民於洛陽之西夏六月復括中州戶口得續戶百有十餘萬初太祖銳意圖中原所得城邑悉分將士至是始以民戶隸州縣秋七月以真定民戶奉太后湯沐此湯沐邑後歸睿宗子中原諸州民戶分賜諸王貴戚后妃舊史謂作魯朵即窩里朵皇兄子拔都

平陽府皇兄察合台太原府

舊作茶合帶

皇子貴由大名府

舊作古與聲相近也食貨志大

皇叔父孛魯古台廣寧府

食貨志太祖弟孛魯古帶大王子廣寧王位撥恩州戶即

此也但紀又有孛魯帶撥那州與志異豈誤分一為二人

歟錢大昕謂志中有八答子名下撥順德戶列於異姓功

臣乃哈喇合係丞相之祖不當列於宗室親王之內故刪

之皇弟果魯干河間府堅食貨志太祖第六子闊列皇從弟

淄川王野苦盪都濟南二府戶內撥賜野苦哈薩爾太皇

叔父遼王幹陳那顏平灤州志作幹真那顏即太宗從弟皇

端邸國公主及駙馬赤苦赤苦即赤窩鄴國公主所適也趙國公主阿刺

海昌國公主果真國王塔思塔思原作查刺溫譯音殊也

之衍郡王鍛真一作段真一作端真郡王蒙古寒札蒙古

忽氏封郡王畏答爾國舅按赤那顏即按陳先鋒折那顏

伯也和斜朮和原作火食貨志作和斜溫竝於東平府戶

元史卷三 本紀

九

內撥賜有差

食貨志太宗是年所撥者尚有二十名紀略不詳

耶律楚材言擾民

非便遂命各位止設達魯花赤朝廷置官吏收其租頒之

非奉詔不徵兵賦楚材又請立編修所於燕京經籍所於

平陽編集經史召儒士梁陟充長官以王萬慶趙著副之

使釋九經進講東宮且令大臣子孫執經聽講秋七月闊

端率汪世顯等入蜀破斬蜀將曹友聞於陽平關遂入成

都招降潼川利州諸路冬十月皇子曲出薨於軍張柔攻

郢州拔荆門軍宋襄陽將王旻李伯淵來降以游顯領襄

陽樊城事遂進攻江陵

九年丁酉宋理宗嘉熙元年也春獵於揭揭察哈之澤諸

王拔都及速不台等征欽察別部康里破之禽康里酋巴

赤蠻進攻斡羅思拔其耶烈贊城夏四月於和林北七十

里築掃鄰城

掃鄰者宮門外  
院官會集之處

作迦堅茶寒殿六月左翼諸

部譌言括民女帝怒因括以賜麾下秋八月令劉中楊奐  
試諸路儒生分經義詞賦論三科中選者除本貫議事官  
得士四千三十人冬十月獵於野馬川幸龍庭遂至行宮  
是冬宗王叩溫不花等入淮西下光州略地至蘄黃宋懼  
請和乃還是年始制軍符驛券給諸王百司印

十年戊戌宋理宗嘉熙二年也春塔思軍至北峽關降其  
將汪統制夏襄陽叛將執游顯等降宋宋兵復取襄樊五  
月於和林北三十里築圖蘇湖城作迎駕殿秋八月以諸  
路旱蝗免今年田租仍停舊欠九月都元帥察罕率兵圍  
宋廬州敗還冬以衍聖公孔元措言收錄金太常禮冊樂  
器樂工始命制登歌樂又從行省楊惟中請建書院於燕



京祠周敦頤程顥程頤張載朱熹

十一年己亥宋理宗嘉熙三年也春復獵於揭揭察哈之澤皇子闊端軍至自西川秋七月游顯自宋逃歸八月元帥塔海將兵入蜀取川北川東州郡尋引還冬十一月皇弟子蒙哥率師圍阿速國之蔑怯思城閱三月拔之十二月回鶻商人奧都剌合蠻撲買中原銀課二萬二千錠以四萬四千錠爲額從之使領諸路稅課所

十二年庚子宋理宗嘉熙四年也春皇子貴由克西域未下諸部遣使奏捷命張柔八萬戶分道伐宋按竺爾進兵東川圖萬州敗蜀舟師於夔夏五月奉使王檝卒於宋宋使來歸檝之喪冬十二月詔皇子貴由班師敕州縣失盜不獲者官爲償之先是令民代償民多亡命今始罷之籍

諸王大臣所俘男女爲民

十三年辛丑宋理宗嘉熙五年也春二月獵於揭揭察哈之澤帝不豫醫言脈已絕皇后召耶律楚材問之對曰帝王修德可回天命今任使非人賣官鬻獄囚繫非辜者多古人一善言熒惑退舍請赦天下囚徒但非上命不可俄帝少蘇聞所奏領行之是夜醫候脈復生適宣讀詔書時也翼日而瘳帝晚年嘗言朕自卽大位較阜考時多四善事一平定金國二設立驛傳三無水草處穹井立營四各城設官鎮守亦有四過失一沈湎於酒二聽婦人言取諸王部下子女三害諫臣多谄勒忽四牆圍野獸致所部怨言楚材屢規帝節飲不止乃持酒槽鐵口進曰麴蘖能腐鐵況五臟乎帝悟敕每飲毋過二鍾然不能常節冬十一

月四日帝將出獵楚材以太乙數推之亟言其不可左右皆言不騎射無以爲樂獵歸帳殿歡飲極夜乃罷果病五日而崩在位十三年壽五十有六葬起輦谷追諡英文皇帝廟號太宗帝有寬宏之量淳樸之質乘開國之運師武臣力繼志述事席捲西域奄有中原惟知諸子不材又知憲宗之克荷而儲位不早定致身後政擅宮闈大業幾淪有餘憾焉是歲以劉敏行尙書省於燕京高麗王王暉以族子縛入質汪世顯復入蜀圍成都守將田顯開北門納師斬宋制置使陳隆之

論曰太宗功業莫大於滅金定中原以終太祖之志雖然使金無可亡之道元豈能亡之哉金自章宗改大定之政盡以涼薄猜鋤宗藩援立庸蕙啟強敵覬覦之心國勢已

不可久宣哀二帝以己强弩之末當敵燎原之初自非命世之材豈易望中興之烈哉然以人事言之有未可盡委諸天意者宣宗於胡沙虎梟獍弑逆之賊不亟正典刑申大義反感其拔立之私委用無貳逮高琪以良禍討殺胡沙虎則又委任高琪舍中都而南遷首激虬軍之變又不以中都專任承暉使輔儲宮固守而以抹撚盡忠掣之及至兩奸竝萃於汴京專議南侵宋以廣地而置河北於不問又築汴京重城營少室山爲御寨避兵而置關陝於不問及至末年始悟二人之罪而戮之而勢已岌岌矣哀宗之立勢更難於貞祐然行省大臣則有胥鼎力全河中之保障名將有陳和尚統忠孝軍屢奏大昌原倒回谷及衛州之捷且關中諸郡完顏合達守之木華黎亦屢攻而不

能入速不台力竭而思還又蒙古兵皆畏暑故太宗拖雷均已北去明汴城鞏固非人力所能攻破也從來艱難再造之主未有不躬親行陣以據形勢而一將士之心者誠使黜白撒蒲阿二人不用而自出關陝帥陳和尚爲中軍完顏合達爲左軍武仙爲右軍而專任胥鼎以河南河中轉輸之事據上游以臨中夏則鳳翔可不失陷而關中可保速不台不敢久畱而秦豫竟三行省可完矣乃明知陳和尚之才而使隸蒲阿爲偏裨知白撒爲人心所憤反陰敕禁軍防守及至諸軍盡覆汴城危迫累卵始議自將出師則已晚矣乃臨難訴哀自憾無罪亡國謂未嘗奢侈未嘗用小人豈知亡社稷於小人之手已非一朝一夕乎嗟乎自古無不亡之國而亡國亦從無不可挽之機若金人

者豈盡元人亡之也哉

定宗簡平皇帝諱貴由太宗次子也長子合失台早世故舊史以次爲長焉母曰六皇后乃馬眞氏以丙寅年生帝太宗嘗命從諸王伐金西征阿速及殲東夏完顏萬奴皆有功太宗嘗言諸子皆不足屬大事獨愛皇弟子蒙哥末年又屬意於皇孫昔烈門謂可爲嗣太宗崩皇后臨朝三載無君內忌憲宗剛明而昔烈門又幼冲至是乃會百官於荅蘭荅八思之地議久不決諸王將謀亂會雷雨大作帳外水深數尺遂各散去后以貴由己所生且年長遂議立帝方帝之未立也后先稱制壬寅春六皇后稱制之元年當宋理宗淳祐二年耶律楚材爲相閱三年甲辰當宋淳祐四年楚材薨又明年乙巳始集諸王大將議立君此

四年中漠北中原事皆無攷其見於史者惟元年壬寅耶律末哥攻蜀取瀘張柔渡淮攻宋滁和揚等州屠通州次年癸卯張柔屯田襄城成杞縣三年甲辰宗王按只台遣濟南軍元帥孟德攻宋濠泗斬黃等州四年乙巳都元帥察罕等率步騎三萬會張柔攻壽泗盱眙揚州趙葵請和乃還及遣阿母罕征高麗克威州平鹵城而已

已上見定宗本紀

是時政在宮闈奸人奧魯剌合蠻以貨得政柄廷中悉側目楚材數面折之癸卯五月熒惑犯房星楚材奏當有驚擾居無何行都譌言兵起倉卒后遂令授甲選腹心至欲西遷以避之楚材言根本一搖四方立亂臣觀天道必無大患後數日乃定后嘗以御寶空紙付奧都剌合蠻使自書填行之楚材曰天下者先帝之天下朝廷自有憲章柰

何付之小人遂止又命刺合蠻所建白令史不爲書者斷其手楚材言國之典故先帝悉委老臣何與令史如不可行死且不避況截手乎且老臣事太祖太宗三十餘年無負於國皇后亦豈能無罪殺臣邪后雖銜之終以先朝勳舊深敬憚焉故主昏於上而清政於下綱紀不至大壞上

見耶律楚材傳

定宗元年丙午當宋理宗淳祐六年秋七月帝卽位於和林朝政猶出母后冬獵黃羊於野馬川以權萬戶史權等耀兵淮南拔虎頭關寨進圍黃州二年丁未當宋理宗淳祐七年春張柔攻泗州夏避暑於曲律淮黑哈速之地秋西巡八月命野里知吉台率朔思蠻部兵西征是月詔蒙古戶每百以一名充拔都魯九月取太宗宿衛之半以耶



曲門荅爾領之冬十月括人戶三年戊申當宋理宗淳祐八年春三月帝崩於橫相乙爾之地在位三年壽四十有

三葬起輦谷追諡簡平皇帝廟號定宗帝崩後議所立未

決或云定宗后擁皇姪昔烈門垂簾聽政者六月

舊史后如傳

或云皇太后乃馬眞氏復治國事

陳桎續通鑑

自後己酉當宋

淳祐九年庚戌當宋淳祐十年連歲大旱河水盡涸野草

自焚牛馬十死八九人不聊生諸王及各部又遣使於燕

京迤南諸郡徵求貨財或於西域回鶻索取珠璣或於海

東搜取鷹鵠驛騎不絕內外離心故無可紀然自太祖崩

後拖雷監國者一年太宗崩後六皇后稱制者四年定宗

之後皇后臨朝者又幾四年前後凡九載無君而國不亂

卒能創業垂統上竝漢唐者則皆宗王宿將維持拱衛根

榦蟠據之力惟其事蹟則文獻綿邈無得而徵焉故附於  
太宗本紀之後示不足紀也曰吾知元末一統以前三宗  
而已

元史卷三終

元史卷四

本紀三

憲宗

憲宗桓肅皇帝諱蒙哥睿宗拖雷之長子也母莊聖太后怯烈氏歲戊辰十二月三日生帝時有黃忽答部知天象者言帝後必大貴故以蒙哥爲名漢言長生也太宗在潛邸愛之養以爲子屬昂輝皇后撫育之嘗攜之出獵遇大風太宗避入帳殿抱帝置膝上撫之曰是可以君天下一日使特牛按豹皇孫昔烈門曰以特按豹則犢將安養帝歎賞之曰是亦可以君天下故又屬意於昔烈門及睿宗薨乃命帝歸藩邸從征伐屢立奇功嘗攻慈嶺西北欽察別部曰康里者其酋巴赤蠻逃於海島帝追至其地適大風刮海水去其淺可渡帝喜曰此天開道與我也遂進禽

之乃班師而水已至後軍有浮渡者復與諸王拔都征幹  
羅思部至耶烈贊城躬自搏戰破之定宗崩朝廷久未立  
君中外咸屬意於帝而宵小忌其英明洵洵議久未決諸  
王拔都穆哥阿里不哥大將兀良合台速不台等咸會於  
漠北拔都首建議推戴時定宗后遣使巴剌在坐曰昔太  
宗有命皇孫昔烈門可君天下諸王百官皆與聞之今議  
欲他屬將置昔烈門何地穆哥曰穆哥即睿宗子太宗既  
有是命前議立定宗時何以不言是則違太宗之命者汝  
等也且蒙哥可君天下亦太宗之言今何獨不可遵邪巴  
剌語塞兀良合台曰蒙哥聰明材武年長且賢人望所屬  
眾悉唯之議遂定

元年辛亥宋理宗淳祐十一年也夏六月西方諸王別爾

哥及脫哈等東方諸王別里古台按只台及塔察爾等西

方諸大將班里赤等

錢大昕曰班里赤疑卽高昌王亦都護也名巴爾朮音相近

東方

諸大將耶速不花等復會於幹難河行在其推帝卽皇帝位追尊皇考拖雷曰英武皇帝廟號睿宗命皇弟忽必烈總治蒙古漢地民戶事開府金蓮川趙璧等撫慰軍民以芒哥撒爾爲總斷事官以孛魯合爲大必闕赤掌宣發號令內外傳奏事以晃兀爾畱守和林宮闕帑藏阿藍荅副之以牙刺瓦赤等充燕京等處行尙書省事賽典赤尼札馬丁佐之以塔納海麻速忽等充別什巴里等處行省事阿合馬耶的沙等佐之以阿爾渾充慈嶺西阿木河等處行省事

阿木河一作阿母河卽大唐西域記之縛芻河水入鹹海

法合魯丁尼只馬丁

佐之以察罕葉爾干統兩淮等處蒙漢軍以帶荅爾統四

川等處蒙漢軍以和里台統吐蕃等處蒙漢軍皆仍前征進誅諸臣持兩端誘昔烈門爲亂者數人遂頒便宜事於國中盡收諸王濫發牌印詔旨宣令諸王馳驛不得過三四馬不得擅招民戶諸王官屬不得借朝覲私斂民財罷築和林城役千五百人盡革近年竊政號令一新中外大說

二年壬子宋理宗淳祐十二年也春正月皇太后怯烈氏

崩夏帝駐和林以太宗諸子孫不得立多後言乃分遷諸

王於各所太宗第六子合丹於別什巴里地即今烏魯木齊太宗

第七子蔑里於葉爾的石河即太祖紀耶爾的石河一作耶里的失太宗諸

孫海都於海押立地海都太宗長子合失之子別爾哥於

曲爾只地未脫脫於葉密立地太宗第五子哈刺察爾之

阿力蒙哥都太子第三子及太宗第六皇后乃馬真氏於

闊端所居地之西舊史作皇后乞里吉忽帖尼今從陳摠

在甘肅永昌舊誤作擴端仍以太宗諸后妃家貲分賜親王定宗后及

昔烈門母以厭禳事覺竝賜死謫昔烈門於墨脫赤之地

禁錮其黨於軍營秋七月詔以中州地封同姓命皇弟忽

必烈征大理宗王圖華薩臣征西域印度國宗王徹的不

華征西域沒里奚國宗王旭烈征西域素丹諸國旭烈一作旭烈

兀即一人也列傳誤作二人宗王耶古征高麗國詔諭宋荆襄樊均諸

守將使來附八月祭天於和林北之日月山王禕日月山記曰山有二

一在漠北和林國語名阿剌溫山一在漠南西路昌州寶山縣北見金史地理志用冕旒及登歌

樂帝獵於月帖古忽蘭之地墮馬傷臂不視朝百餘日十

二月合祭昊天天后土始大合樂作神牌以太祖睿宗配禮志



作八月十二日通鑑紀事本末作十二月按前書八月八日祭天甫四日又合祭天地無此數讀之理志文十二日蓋十二之誤大赦天下選諸色目人掌帑藏掌行帳掌祭卜巫

醫掌驛傳掌必闡赤繕發宣詔等官徙諸匠五百戶修行

宮以西域僧那摩爲國師掌天下釋教以道士李眞常掌

道教

李眞常卽上處機之弟子

是歲籍漢地民戶印度遣使入貢

三年癸丑宋理宗寶祐元年也春正月帝獵於徹蹇察罕

之地會諸王於幹難河北大頒賜予諸王耶苦卽耶古以怨

襲諸王塔刺爾之營遂罷耶苦征高麗兵以札刺台代行

遣必闡別爾哥括幹羅思戶口三月敗宋兵於海州獲其

都統夏六月命郭侃等從宗王旭烈征西域哈里發巴哈

塔等國又命塔爾台圖魯華等征印度及怯失彌爾國西

方王拔都遣使乞買珠銀萬錠以千錠授之詔曰太祖太

宗之財豈能給諸王如此耗用此銀就充後歲賜數秋幸

軍海子

凡海子舊史皆作臘兒蓋塞外呼海子爲淖爾也

九月皇弟忽必烈征大

理次特刺地分兵三道進執其王段智興以歸大理平畱  
兀良合台攻諸蠻未服者而自還軍四川忽必烈命四川  
總帥汪德臣城利州屯田以備蜀命宗王耶虎與洪福源  
征高麗拔禾山東州春州三角山楊根天龍等城

四年甲寅宋理宗寶祐二年也春帝獵於徹蹇察罕夏幸  
月爾蔑怯之地秋七月詔官吏之赴朝會計錢糧者許自  
首不公仍禁以後浮費冬大獵於耶滅千哈里察海之地  
忽必烈還自大理遂自四川入覲於行在是歲會諸王於  
顓顓海子之西仍祭天於和林北之日月山初籍新軍命  
大臣舉將才擢史樞征行萬戶駐軍唐鄧張柔移鎮亳州

權萬戶史權屯鄧州忽必烈置經略司於汴分兵屯田西起唐鄧東連清口桃源列障守之宋統制甘閏城紫金山汪德臣襲據其地張柔奏築甬路自毫抵汴堤百二十里以通兩淮軍餉宋均州總管孫嗣以蠟書降且乞援史權以精甲據險要援之自是宋驍將各帥所部先後來降五年乙卯宋理宗寶祐三年也夏帝幸月爾蔑怯之地秋九月兀良合台自吐蕃進攻烏蠻白蠻鬼蠻盡降之得五城八府四郡蠻部三十有七張柔會大帥於符離復築臨淮甬道自毫南六十里以通陳蔡潁息舟餉札刺台與洪福源征高麗拔其光州安城中州玄鳳珍原甲向玉果等城

六年丙辰宋理宗寶祐四年也帝會諸王百官於裕爾陌

哥都之地設宴六十餘日賜金帛有差仍定擬諸王歲賜錢穀續簽漢軍從忽必烈南征夏四月駐蹕塔密爾河五月幸昔刺帳殿六月太白晝見秋七月遣使問諸王駙馬軍過山東掠民羊豕之罪由是諸軍所過無犯是歲高麗國王雲南酋長及素丹諸國來覲兀良台台既討平諸蠻遂自馬湖江通道於嘉定重慶遣使以雲南平獻捷於朝命依漢故事分西南夷爲郡縣授劉時中爲宣撫司與段氏共安輯之進圖交趾賜雲南軍士采帛萬二千匹始建城市宮室於桓州東灤水北之龍岡是爲上都卽開平府也是冬以西域阿木河回回降民分賜諸王百官

七年丁巳宋理宗寶祐五年也春詔諸王出師征宋夏六月謁太祖行宮祭旗鼓復會於客魯連河秋駐蹕於軍海

子灑馬乳祭天九月帝以宋人背盟自將南征以駙馬刺眞之子乞解鎮守阿羅思回鶻獻水晶瓶珍珠繖等物直銀三萬餘錠帝卻之且禁後毋復獻宗王塔察爾率諸軍南征圍樊城霖雨連月乃還元帥布鄰吉台軍自鄧州略地遂渡漢江是歲兀良合台自大理入覲遂經六盤山至臨洮府與大營合月餘復命西征自四川赴雲南秋九月兀良合台率段智興伐交趾十一月入其國安南王陳日昷竄海島遂班師遣阿藍荅及囊加台等行省事於陝西等處置鈎攷局會計錢穀旣而罷之冬帝渡漠南皇弟忽必烈及諸王公主等來迎大宴於玉龍棧遣歸

八年戊午宋理宗寶祐六年也春正月受朝賀於耶里本多哈之地二月陳日昷傳國於長子光昺遣使來貢方物

詔兀良合台引交廣兵北還會攻鄂皇弟旭烈率大將郭  
侃討平回鶻乞石彌爾及報達哈里發諸國禽其王來獻  
捷又渡海收富浪國轉戰萬里詔以旭烈畱鎮西域帝自  
將伐宋至東勝適河冰合覆以土遂濟四月駐蹕六盤山  
議由蜀攻其上游先命張柔從忽必烈攻鄂州命塔察爾  
攻荆山以分宋兵力是時御營軍四萬號十萬分三道進  
帝由隴州入散關諸王莫哥由洋州擣巴州之米倉關關在小巴山絕頂今移於大巴山之麓李里察萬戶由漁關入沔州以明安荅  
爲太傅守關中畱兵守六盤山行宮五月皇子阿速台獵  
傷民稼帝讓之撻其近侍數人諭士卒拔民一草者斬以  
徇所至秋毫無犯秋七月以輜重畱六盤山率兵由寶雞  
進棧道九月駐蹕漢中冬十月帝次利州渡嘉陵江至白

水江造浮梁以濟初宋余玠帥蜀相度形勢徙利州治於金堂縣之雲頂山築苦竹隘於小劔山以備外水又徙合州城於釣魚山徙閬州治於蒼溪縣之大獲山徙順慶府治於青居山徙蓬州治於雲山徙渠州治於禮義山徙巴州治於平梁山又於昭化縣之長寧山劔州之鵝項嶺皆築堡戍守以備內水棋布星羅積粟繕兵守禦甚固我師所至購土人鄉道招降抵劔門攻小劔山之苦竹隘久不克會宋裨將趙仲引師入陷焉苦竹隘在小劔山絕頂四面斷崖前臨巨壑孤門控據一夫可守都元帥紐璘攻圍雲頂山降其守將雲頂在成都府金堂縣南山五十里本名石城於是外水失險時大軍志在由東川內水直出大江故不趨成都乃以紐璘守成都畱精兵五百守小劔遣使招諭龍州十一月帝自劔門南進遣兵圍昭

化縣之長寧山堡

山在縣西南九十里下險

帝督軍先攻

劍州之鵝項堡

今劍州南二十里有鵝項嶺項舊誤作頂

力戰竟日破其城宋

守將王佐徐昕等皆戰死進攻閬州之大獲山降其城

頂

有石城周十里余玠築此城爲閬州治與蒼溪縣倚角

是月龍州降十二月都元帥

紐璘攻簡州帝次於運山遣人招降其守將師至順慶府

之青居山下其城

山在順慶府南充縣南三十五里山高聳而頂平瞰嘉陵江余玠徙府治於此

蒙古陷之置征南元帥府形勝甲於一郡

又招隆州石泉大良山皆下進攻雅

州破之詔諸軍毋俘掠諸王軍分路略地至江而還竝會

於行在而四川都元帥紐璘亦畱兵守成都自將數萬人

舟數百艘渡馬湖江攻重慶溯流與大軍會惟合州守將

王堅固守釣魚山不下屢招拒命是歲李璫攻宋海州漣

水軍拔四城殺宋軍幾盡是冬詔兀良合台雲南軍以明



年會長沙與皇弟忽必烈南北夾攻宋

九年己未宋理宗開慶元年也春正月駐蹕重貴山北置

酒大會諸王大將問曰今在宋境軍日南行夏暑且至北

軍其可久留乎大將脫歡請大軍暫北還巴里赤願留攻

帝遂留屯於蜀諸王莫哥復攻渠州禮義山

山在渠縣東六十里西距

渠山十里有城趾宋寶祐中嘗徙渠州治其上以拒蒙古耶律圖魯雄攻巴州平梁

山在巴州西二十五里山頂石城兀良合台師還自交

趾由內地象州入靜江府連破湖南辰沅遂圍潭州會皇

弟忽必烈軍於鄂二月帝悉諸軍渡嘉陵江會戰合州城

下城據釣魚山涪江嘉陵江環其東南西三面峭壁上有

天池周五百步粟支數年守禦甚固三月蒙古兵仰攻各

門不克夏四月丙子大雷雨凡二十日五月屢攻輒卻六

月汪德臣復選精兵夜登外城馬軍寨遲明遇雨梯折後  
軍不克進而止凡五閱月不克帝觸暑雨不豫秋七月畱  
精兵三千守合州餘悉遣攻重慶是月帝崩於合州壽五  
十有二在位九年諸王大臣奉梓宮北還葬起輦谷追諡  
桓肅皇帝廟號憲宗帝早親軍旅剛明沈斷威著中外卽  
位以後不樂燕飲不好侈靡雖后妃不許過制初太宗崩  
後曠紀無君黃裳御統政出多門阿柄幾於旁落至是凡  
有詔旨帝必親起草更易數四然後行之御臣下甚嚴嘗  
謂臣下獎諭太過卽志氣驕溢過咎隨之是害之也承開  
國師武臣力之後西平印度南并大理東取巴蜀所向無  
敵惟遵其國俗喜田獵信巫覡卜筮是其小蔽使太宗卽  
世早承大業則伐宋之役不俟末年而南北混一矣天未

既宋暑雨老師景命不延故大勳重集於世祖皇帝宋將孟珙自會攻蔡州後卽經營襄陽浚城池積軍儲厲士馬嚴守備當大軍攻襄陽時孟珙方守江陵宋復詔珙收荆襄珙謂必得郢然後可通餽餉得荆門州然後可出奇兵指授方略所至克捷珙又奏襄陽爲東西根本今百戰而得之當加經理非甲兵十萬不足以分守又分兵入蔡州火其積聚又於鄧州順陽燒其船材擾其屯糧與四川余玠一守上游一守中路故蒙古諸軍久不得志帝因暑雨病殞西蜀而退不然東南事久不可問矣

論曰世之亡國未有如宋之自取者也金於元無啟釁之罪而元於金有必取之心和亦亡不和亦亡宋則僻處南服炎徼水鄉本非蒙古所覬覦其始假道滅金爲宋復仇

畫蔡爲界盟誓未塞不旋踵而有端平入洛之師自構兵  
端及合州固守憲宗告終皇弟遠在鄂城內顧家難倉皇  
北去和亦歸不和亦歸元人已無心於江左矣信使東來  
前好可繼而卽有拘使抗命之行猶遲之又久而後渡江  
宋負元元不負宋其罪浮於金人數倍矣烏乎北宋不能  
取垂亡之遼以復燕而欲挑釁於方張之金以擴土南宋  
不能蹙垂亡之金以取蔡而欲抗并吞之蒙古以恢汴自  
古謀國之舛未有如宋人之甚者天方將啟元運混一區  
宇有莫之爲而爲者乎攷金求和於元者六次一宣宗貞  
祐二年請太祖解燕京之圍議昏公主而後班師二宣宗  
貞祐三年遷汴復遣求和而太祖命盡獻河北去帝號爲  
河南王金不從三宣宗興定五年遣烏古孫仲端逾慈嶺

求和稱太祖爲兄不允四宣宗元光元年復遣仲端詣回紇國行在求和命盡割關西地爲河南王不果五哀宗正大六年遣使弔太祖之喪竝歸贈太宗卻不受六哀宗天興元年圍汴京遣其兄子曹王譌可入質而速不台仍不肯退師此金之於元萬無可解免者也又攷宋殺元使五次一太宗時遣朔不罕由漢中假道被殺二月里麻思由淮東假道被拘三廉希賢至獨松關而張濡殺之四遣張羽等復書至平江而亦被殺竝郝經被執而五其宋人遣使與元通和者二一寧宗嘉定十四年遣苟夢玉通好於太祖約共攻金二理宗紹定五年太宗遣王檝至宋約共伐金宋遣鄒伸之報謝約成功後以河南歸宋烏乎當建炎南渡之始舍宗李岳韓劉吳名相名將不用而惟稱臣

稱姪於不共戴天之女真及理度垂盡之朝力拒講解通和而日生釁挑兵於毫無夙隙之蒙古國既亡矣而又予元以奉天討罪之名果何爲哉果何爲哉

元史卷四終